

**Date – 29/11/2024**

**Time - 7:30 -7:40Hrs**

**REGIONAL NEWS BULLETIN**

**HEADLINES (MORNING)**

- 1. Chief Minister Pu Lalduhoman nakum February thlaa Village Council an inthlan hnuah, Financial Year thar April thla atangin hna an thawk thei tawh dawn a ti.**
- 2. Sorkar chuan Retailer-te hnen atanga buara bag lakkhawmte chu Sawhthing leh a dang chingtute hman turin ruahmanna a siam dawn.**
- 3. Nizan khan International Film Festival of India vawi 55-na Goa-ah khar a ni.**
- 4. Prime Minister Narendra Modia chuan vawiin hian ni thum chamin Odisha a tlawh dawn.**

<><><>

**CM**

**Chief Minister Pu Lalduhoman nakum February thlaa Village Council an inthlan hnuah, Financial Year thar April thla atangin hna an thawk thei tawh dawn a ti.**

**Chief Minister hian nimina ZPM Southern Hqrs Office ah thu sawiin, kum thar 2025 February thla chawhnu lamah Village Council inthlanna neih tura ruahman mek a ni a ti a, VC term pawhtawi leh pawhsei chu sorkar thuneihna a ni a, Court ah pawh khing se buaina tur a awm hran lo a ti a, Financial Year hmaa an inthlan fel chuan Village Council thar-ah chuan kalphung thara kal an duh dawn ani a ti a, Financial Year thar ah a hlui an kai chuan buaithlak a awm theih thin avangin hetiang ruahmanna hi siam a ni a ti.**

**Village Council term kal mek hi Covid avangin pawhsei a ni tawh a, a tul hunah Sorkar chuan a pawt sei theiin a pawt tawi thei a, hei hi Sorkar thuneihna a ni a, tunhma pawhin pawh sei leh pawh tawite alo awm tawh thin a, thuneitute thu neihna a ni a ti bawk.**

**Chief Minister Pu Lalduhoma chuan Hand-Holding chungchang ah Loan lak chi leh Chief Minister's Special Package -a thlawn a cheng nuaikhat thleng lak theihna a awm tih sawiin, November thla thleng dilna hun hawn a ni a, heng diltute hian tunah hian an hmuhloh pawhin an dilna hi an ring zel thei dawn a ti a, tun December thla chung hian CM's Special Package bik hi Selection neih tum a, tun financial Year chung ami tur hi chu a Pilot Project anga kalpui a nih thu leh nakum leh a kum leh ah tam leh zuala kalpui chhoh zel tum a ni a ti.**

Chief Minister chuan Sawhthing, Aieng, Hmarcha leh Hmunphiah lei turin Expression of Interest (EOI) Advertisement tihchhuah tawh a ni a, lei duh tur e nen inremna siampui tum mek a ni a ti a, Sawhthing lei duh Em-pannel Firm te chu Sorkar hmun hma Godown te hman phalsak an ni dawn a, inremna an ziahpuite hnena hralh te hnenah support price an pe ang a ti.



PM VISWAKARMA

Commerce & Industries Minister Pu F. Rodingliana'n Mizoram Industrial Policy duan mekah sorkar danga la awm ngai lo hamthatna tam tak a awm dawn tih a sawi.

Nimina PM Vishwakarma Exhibition & Trade Fair a hawnaah he thu hi sawiin Minister chuan industry hmasawna lam hawiah an sorkar tirh atangin sum an dah nghal a ti a. Minister chuan policy a that loh chuan hnathawh a that pawhin hlawhtlinna a awm hleithe lo a ti. Minister chuan kut themthiamte inphochhuahna tur PM Vishwakarma Exhibition chu Kutthemthiamte puitu tha tak a nih a beisei thu sawiin PM Vishwakarma chu hman tangkai chuan hlawhtlinna tur thil tam tak tih theihna a ni a. Tereuhte atanga bul tanin lawmna a tam tih sawiin Minister chuan ngaihtuahna thar nena hma la turin kutthemthiam kalkhawmte chu a sawm a ni.

Branch MSME-DFO, Aizawl-a Deputy Director Pu Lokesh Parganiha chuan PM Vishwakarma chungchang sawiin kum 2023-a Prime Minister Pu Narendra Modi-an India ram hmun hrang hrang kutthemthiamte dawmkan nana a hawn a ni a ti a. Kum 1 chuang hret hnuah dilna vbc 2 leh nuai 60 a luh tawh thu leh India ram pumah kuthemthiam, artisan nuai 25 chuang verified tawh an nih thu a sawi a. Mizoramah pawh mi 10,744 register tawhin mi 2609 chu level 3 certified an awm tawh tih a sawi bawk a ni.



SUPPLY

Sorkar chuan Retailer-te hnen atanga buara bag lakkhawmte chu Sawhthing leh a dang chingtute hman turin ruahmanna a siam dawn.

Food, Civil Supplies & Consumers Affairs Department chuan thuchhuah siamin, Supply Department-in mipuite hnena Ration buhfai buk dik pek chhuah a tumna kal zelah Retailer-te hnen atanga ngenna a dawn angin buhfai bag rihna 580 gram chu godown-ah paih thin tawh tur a ni a, retailer ten buk dika buhfai an pek chhuahna ah buara bag rihna paih loh chu chhuanlam ah an hmang tawh tur a ni lo a ti a.

Retailer ten mipuite hnena buhfai an pek chhuahin buara rihna, a bukna hmanraw rihna te an chhiar tel tur a ni lo a, Retailer ten Digital Weighing Scale (DWS) an hmang vek tur a ni a. An hmang lo anih chuan dan anga hmalak a ni ang a ti ani.

Mizoram sawrkarin Card Vara dinmun harsa la awmte puala buhfai ₹20/- per kg a an khul theihna tur Card Sen a duan chu mimal emaw pawl ho ang emaw pawhin mahni awmna DCSO ah ziakin dilna thehluh theih a ni tih sorkar thuchhuah chuan a tarlang bawk a ni.



## TOMATO FESTIVAL

Govt. Deputy Chief Whip Pu W. Chhuanawma'n KVK Khawzawl Golden Jubilee a hmanpui a kuthnathawktute hnenah thlai chi thahnem a sem

Pu W. Chhuanawma chuan Tuichang bial chhunga kuthnathawkte taima a tih takzet thu sawiin an thawhrimna fakawm a tih thu a sawi a, KVK Khawzawlte'n kuthnathawktute thlai chin kawnga tanpuina leh zirtirna an pek thin chu ropui a tih hle thu a sawi baw. Pu W Chhuanawma chuan kuthnathawh hi hna zahawm leh ngaihsanawm taka a ngaih thu a sawi a, mi zahawm tak tak hmaa thu a sawi thei chu lawmawm a tih thu a sawi baw. Thawhrimna atang chauhlin hlawhtlinna a awm tih sawiin malsawmna dawng zel turin theih tawp chhuah a thawk zel turin kuthnathawkte a fuih baw a ni.

Thu a sawi zawh hian Pu W Chhuanawma hian kuthnathawktute hnenah thlai chi sem a sem chhuak a, KVK Golden Jubilee pual hian thlai chi thahnem tak sem chhuah a ni.



## IT TRAINING

NIELIT Lunglei leh Mizoram Police ñang kawp huaihawtin SP Conference Hall, Lungleiah Southern Range huam chhunga police-te tan computer leh internet hmanga data pawimawh vawn ñat dan leh pawikhawihna beih let dan zirna, 'One Day Awareness Training on Protection of Data and Digital Public Goods for Government Employees and Police Officer' chu nimin khan buatsaih a ni.

Lunglei District Superintendent of Police Pu J. Lalmuankima chuan training hi hawngin, Mizoram Police leh NIELIT te ñang kawpin SP Office, Lungleiah police-te tan Computer Training Centre ruahman a nih thu leh hawn theih ñep a nih thu a sawi a. Computer Training Centre-a hman tur computer full set 22, computer dawhkan leh ñhutthleng bakah, 72 inch monitor dah fel tawh a nih thu sawiin, Computer Training Centre-a zirtirtu atan Pu Lalrinmawia, B.E. (Computer Science & Engineering) chu lak fel a nih tawh thu a tar lang baw.

He training-ah hian Southern Range huam chhunga police mi 27 an tel a. Tun lai information technology thiamna sang chho zela sualna pung chho zel do tura police-te tana hriat tur pawimawh hrang hrang zir ho a ni a. Pu Lalrempuia Sailo, Principal Technical Officer, NIELIT Aizawl leh Pu Lalrinmawia, Faculty, NIELIT Lunglei te'n internet kal tlanga dan bawhchhiatna leh pawikhawihna hrang hrang ven dan leh beih let dan te, mipui leh digital data venhimna leh hnu chhuina kalpui nana internet leh khawl hrang hrang hman dan te an zirtir a. Training-a tel zawng zawngte hi certificate hlan vek an ni.



## MNF PRESS CONF

MNF party chuan Manipura pawisawi lo te tawrhna kal zel titawp thuaiturin sorkar laipui an phut tih an sawi.

Nimina Media & Publicity General Secretary Pu VL Krosshnehzova hoAizawl Press Club-a chanchinbumite an kawmnaah he thu hi sawiin, MNF chuan Manipur tualchhung buaina avangin Zohnahthlak unaute zingah nunna

chan mi 219 an awm tawh a ti a. Kristiante Biak In 360 chuang tihbawrhban leh halral a nih tawh thu leh, chenna in 7000 chuang meivapah chantir a ni tawh a ti a. Heng bakah hian khua atanga umchhuah, sahamna zawnga mahni in leh lo tlansan mi 41,125 chuang an awm mek tih sawiin heng chhiatna leh buaina thleng zawng zawngah hian Manipur state hotu Chief Minister Biren Singh chuan mawh a phur bera an ngaih thu an sawi a ni.

#### BYTE of VL Krosshnehzova

MNF chuan democracy ram lian bera chhal theih India rama mipui thlan sorkarin mipui chung a tawrhna thleng a en liam mek chu democracy laka helna a ni an ti a. Manipura an unaute tawrhna chu an tawrhna a nih tlat avangin an tan ngeth taka ding zelin, MNF chuan a maimitchhin san ngai dawn lo an ti a. MNF kaihhruai sawrkar kal ta, Chief Minister huaisen tak, Pu Zoramthanga hruaina hnuaiyah khan unaute thlavang hauh kawngah na takin ke pen a ni tawh an ti a. Mahni hnampuite nunna humhim tur leh mahni ram chhan tura kan unauten an beihna kawngah inpumkhat leh lungruual taka thawk ho a, Zo nunmawi a taka lantir zel turin an duh tih an sawi a.

Mizoram sawrkar pawh inhumhimna zawnga Mizorama awm mekte tuamhlawm kawngah leh Manipura unaute thlavang hauh kawngah huaisen takin pen zel tur leh tun hmaa an sawi thin anga hnam thinlung pu thar leh turin an phut tih an sawi a. Ram leh hnam tana hma an lakna kawngah chuan theihtawpa tawiawm an inhuam reng thu an sawi a ni.



#### AIR ON SOCIAL MEDIA

Chanchintha hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchintha hi ngaihthlak leh chhiar theih a dah a ni.



#### MANIPUR

Manipur ah chuan vawiin atangin sikul leh college zawng zawng hawn a ni dawn. State sawrkar thuchhuah chuan University thlengin zirna a pangngaia kalpui tawh turin a ti a ni. Manipurah hian tun thla ni 16 atanga khan zirna inte khar a ni a. Jiribam district-a mi paruk thah an nih avanga buaina a chhuah avangin zirna inte hi chhonzawm theih loh in khar a ni.

Hetihlai hian internet erawh district thenkhatah la tihtawp chhonzawm a ni ang.



#### IFFI

Nizan Khan International Film Festival of India vawi 55-na Goa-ah khar a ni a. Kharna inkhawmah hian ramchhung cinema-a mi langsar tak tak an tel a. Award ngaihhlut hlawh Golden Peacock Award chu Toxic director Saule Bliuvaite hnenah hlan a ni.

Ni kaw chung IFFI hman anih chungin tawng hrang hrang 180 chuang tihchhuah a ni a. Hnam ziarang leh rimawi ngaihnawm leh hmuhnawm tak tak entir a ni bawk.



## UJALA

Sawrkar laipui chuan UJALA scheme hnuaia LED bulb sem chuan kum tin cheng vaibelchhe singkhat leh sangkaw chuang a hum a ti. Lok Sabha ziaka zawhna chhangin Union Minister of State for Power Shripad Naik chuan he scheme avang hian energy unit 4800 kumtin khawl a ni a ti a. Hei bakah hian boruak tha lo CO2 pekchhuah pawh kumtin tonne 4 in a ti tlem a ti bawk.



## PM

Prime Minister Narendra Modia chuan vawiin hian ni thum chamin Odisha a tlawh dawn a. A cham chungin programme pawimawh tak tak a tel dawn a. Heng zingah hian All India Director General leh Inspector General of Police Conference, Bhubaneswar-a neih turah a tel ang a. Conference hi ni thum chung awh tur niin Lok Seva Bhavan ah neih a ni ang. PM Modia bakah hian mi pawimawh tak tak an tel dawn a. Union Home Minister Amit Shah leh National Security Advisor Ajit Doval te pawh an tel dawn a ni. Cybercrime leh firfiaka chetna chungchangte he conference-a ngaihtuah turah hian an tel a ni.

